

Quota International of Aruba cu directiva nobo

Regine van Drie a pasa e timon over pa Suzy Maduro

ORANJESTAD - Entrante dia 1 di mei Quota International of Aruba a cambia directiva. Durante un celebracion ameno na Hyatt Hotel siman pasa e directiva nobo a wordo instala. Nan ta: Suzy Maduro, Presidente, Evelyn Wever-Croes, Vice-Presidente, Jeanette Solognier, Tesorero, Muzaninn Wever, Secretaria, y demas miembronan di directiva Chima Arendsz, encarga cu presupuesto, Ursie Nassy, encarga cureglanan, Ivy Simon, encarga cu

servicio, Juliska Harms, encarga cu desaroyo y crecimiento di miembrecia. Presidente saliente Regine van Drie a repasa e aña 2008-2009, y a gradici tur esnan cu a yuda hasi e aña 2008-2009 asina exitoso, y a desea e directiva nobo hopi exito. E ceremonia di instalacion, na encargo di Enid Croes-Marugg, tabata uno hopi bunita.

E presidente di Quota International of Aruba 2009-2010 Suzy Maduro den su speech

a subraya cu e aña aki Quota International Inc. ta cumpli 90 aña di existencia cual ya caba ta algo cu ta marca historia. El a splica cu Quota International funda desde 1919 pa sra. Wanda Frey Joiner na Buffalo, N.Y., Estados Unidos tabata un iniciativa pa e hende muhernan ehecutivo como cu e tempo ey e club local di su casa Kiwanis Club no tabata tin lugar pa ehecutivonan femenino. Awendia, Quota International ta inclui Quota International of



Aruba cu a funda desde 1987. Quota International of Aruba ta un organizacion di servicio dedica na mehora calidad di bida di esnan menos afortuna den nos comunidad, especialmente esnan cu problema di oido y habla. Durante e añanan



e grupo di Quota di Aruba a sostene hopi programanan special, pa e gruponan di hende muhernan den dificultad, muchanan desafortuna y personanan cu problema cu habla, oido y te hasta bista. Quota a implementa por ehempel hunto cu Wit Gele Kruis y Valero un test special cu awor tur baby cu nace ta haya na nos hospital, di manera cu por tin un intervencion posibel na inicio si constata cualkier problema cu e oido.

Quota ta traha cu varios otro organizacionnan y otro clubnan di servicio formando parti di proyectonan cu tin di haci directamente cu hobennan y otro aspectonan cu ta regarda pa duna bek na comunidad y yuda esnan den necesidad.

“Nos a caba di ricibi e grato noticia cu nos centro cultural “Cas di Cultura” hunto cu Quota desde awor en adelante ta equipa cu un sistema di asistencia pa clientenan cu tin problema cu oido of ta sordo di manera cu nan tambe por goza di presentacionnan den Cas di Cultura. Esaki pronto lo ta oficial”, asina Sra. Maduro a conta.

Sra. Maduro a bisa tambe cu tur locual cu ta haci den forma di e proyecto y servicionan asina ta posibel unicamente cu fondonan cu e miembronan ta recauda primordialmente durante e evento annual di Fundraising di Quota na unda e comunidad commercial y priva ta contribui grandemente. Sra. Maduro a sigui bisa cu e ta orguyoso di varios miembronan di Quota manera por ehempel, Sra. Audrey Lacle cu ta resalta den nan trabounan pa esnan cu

ta adicto. Tin hopi miembronan ta haciendo un tremendo trabou na Aruba conhuntamente cu otro organizacionnan tambe. Riba tereno internacional, el a bisa cu un miembro cu a hiba no solamente e club pero e nomber di Aruba padilanti ta Sra Enid Croes Marugg cu na 2006 a tuma e corahe pa ta e presidente internacional na unda entre otro el a logra pa un participacion mas activo di Quota den United Nations na unda el a expande y reviva e lasonan cu Quota International tabatin cu United Nations. Nos tin otro miembronan manera Sra. Noris van Lis Donata cu tabata Gobernador den pasado y actualmente Sra. Annemieke Dijkhout cu a caba di wordo nombra como Gobernador di e distrito 42 bou di cual Aruba ta cai hunto cu Hulanda, Suriname, St. Maarten, St. Eustatius y Corsow ta cai. Sra. Maduro a gradici e presidente saliente Regine van Drie hunto cu su team pa e tremendo trabou cu nan a desplega durante e aña na unda cu nan a trece ideanan hopi inovativo den Quota.

El a gradici su propio team pa 2009-2010 cu nan tabata dispuesto pa tuma e reto pa e proximo temporada.

“Cu passion intenso pa yuda otronan, un actitud positivo, comprension y dedicacion den tur locual nos ta haci pa Quota, ta e elementonan pa nos tin exito pa nos Quota Club y nos lo por logra hopi cosnan grandi pa esnan cu mester di dje”.

Nos ta desea e directiva nobo di Quota International of Aruba hopi exito den e aña aki.